

編號 1 號

【耐命个蜚蜚仔】李淑娟原作

蜚蜚仔做得講係世界最耐命个蟲仔，無論在仰般个環境都做得生存。先生識講過：「人類出現在地球个三億年前，蜚蜚个老祖先早就在這作竇。」佢腳髀頂硬釘个短毛當敏感，略略仔感受著毋著向，黏時斯走到兩腳無貼地，瞞下目就看毋著蟲影咧。莫看佢細細隻仔，該斯係佢最驚个蟲仔哦！

冬下頭一隻半夜，佢本成壅等被骨在夢中摻孫猴仔學習長生不老，玄風感覺著有麼个東西對佢个嘴角趨啊過，有滴仔撓人¹！佢伸手一掬，摸著一隻硬硬滑滑个殼，黏時擘開目珠清醒咧。阿姆哀！在佢个枕頭頂，一隻大蜚蜚摻佢兩對相，嚇到佢心寒膽顫，尿差一息斯拉出來。「啊！」佢擲直喉嚨咳喊到大嫫牯聲。

「恁夜咧蛇聲鬼噉，噉噉滾做麼个呢？」阿姆黏時開門落來。佢一看著救星來咧，煞煞飄過去摻佢个肚屎掬纏纏，硬硬會噉出聲：「蜚……蜚蜚仔！有蜚蜚仔！」

順等佢个蛇頭指看過去，既經用飛簷走壁大法黏在白壁頂个蜚蜚仔，就像一隻著等金若若西裝在該抹鬚搨派頭个老先生。阿

¹ 撓人：音 neu` ngin；搔人家癢。

姆利利个眼箭射啊過去，手板當遽擲出掣仔鞋，「啪！」一聲，射到的準²！毋過大蜚蜚仔也毋輸人，閉開薄翼像子彈樣對等佢兜飛過來。

「啊！」佢嚇到噉噉殺天，遽遽飄上眠床，一下毋記得自家既經超重个體重，盡命牯在眠床枋頂高蹦跳。這下慘咧，毋知係眠床枋忒薄抑係佢忒大籬，噉噉一聲，眠床枋嘎分佢蹬必忒咧。

「眠床枋會分你蹬潔忒咧，還毋遽遽下來……。」頭先八面威風个阿姆這下無心接受挑戰，幹轉身來「關心」佢這隻受災難民，拈起打過蜚蜚仔个掣仔鞋出力擊佢个腳囊肚。無膽个佢一看著鞋底還黏等蜚蜚仔个一皮薄翼，加勝飄到半天高。「砰！」一聲，衰過个眠床枋正式分佢蹬潔一大空，這下佢姆个面看起來比蜚蜚仔還較得人驚咧。

在阿姆个喝咄聲中返生个蜚蜚仔手爬腳蹶，一下就鑽落壁肚个細縫仔逃命去咧。下後佢同等阿姆燒暖个被骨緊想：若係蜚蜚仔摻孫猴仔比賽長生不老，毋知哪隻會較厲害？

² 的準：音 dag zhun'；很準。

編號 2 號

【棒球】郭亭好原作

電視報導臺灣隊拿著世界棒球十二強冠軍，所有球員暢到捕共下又笑又噉。這隻冠軍，臺灣等有三十二年恁久咧。頒獎典禮放「中華奧會會歌」，去現場看比賽个臺灣球迷目汁濫泔跔等大聲唱，看轉播个佢乜感動到歸身雞麻皮膨膨起。

想起細人仔時節，佢兜莊肚有一群細人伴當興棒球，長下會湊等去練習打。見知得哪時有棒球比賽个轉播，斯會湊好兜等矮凳頭，去阿量伯个雜貨店共下看轉播。大家看到當入文，心情乜會跔等中華隊个打擊膠防守起起落落。看著中華隊打出安打抑係全壘打，佢兜會歡喜塵天，緊敲乳粉笏、嘶無停，毋過若係分別儕得分，大家又會緊張到唉唉唧唧。佢兜平常時打球仔無半撇，毋過到看轉播比賽个時節，噯變成像專業个球評，話著自家當會樣。

佢兜打球个球棒，係膠賣杉樹个阿財伯討个；球係學校先生無愛个網球；手袋仔係佢兜用幾張舊報紙層共下摺出來个；球場斯係阿明牯屋脣个空地，用幾坵磚角做壘包，斯好到耐毋得咧。有一擺，佢兜當在該打棒球，烏狗阿旺看著佢兜个球仔，噯開始

發肉雄，球仔傳到哪佢斯追到哪，一下無注意，阿旺躍跔起來呷著球仔，斯飄落田肚去。佢兜為著膠唯一个球仔追轉來，哪還顧得著該係人辛苦耕个田，歸陣細人仔斯飄落田竇肚去追阿旺。

在上夫田做事个阿和伯，看著佢兜歸陣蹴落田肚，大嫲牯聲哆人，還追等過來：「還攏人、還攏人！田躡¹壞淨淨咧，無人教招²係無？」旨知無追無恁死，阿旺看著大家追來，噯越發暢、飄上飄下走分佢兜追。斯恁樣阿和伯追佢兜、佢兜追阿旺，膠一夫好好个田躡到歪哥淒汙³。該日轉夜了後，大家做下食著世大人準備个好料——「竹筍炒肉絲」，食到飽餵餵仔！

大咧了後，雖然大家四散各地，過等無共樣个生活，毋過轉莊下个時節，還係會湊等共下泡茶坐寮，講起佢兜該有歡喜、有快樂、有目汁、有笑聲个童年。雖然該下佢兜麼个都無，無錢買冰、無錢買零嗒、無錢買玩具，毋過佢兜有當單純个快樂，乜有當珍貴个童年。

¹ 躡：音 lien^ˇ；反覆蹂踏。

² 無人教招：音 mo ngin gau^ˇ zhau[`]；沒家教、沒教養。

³ 歪哥淒汙：音 vai go ci^ˇ ca^ˇ；形容物體歪斜不正。

【博人惱个木棉樹】邱碧蓮原作

學校肚个籃球場脣，種有兩排當大頭个木棉樹。逐年一到三、四月，木棉花開花个季節，開到鬧熱煎煎，歸樹頂紅啾啾仔當好看。企在樹下看，紅色个花襯等白雲，有影靚到值得人安腦！錫著過路个人儕儕就講：「哇！實在還靚！還浪漫哦！」但係麼人知？這花靚係靚，乜盡搥衰人哦。靚个背後，其實係一場得人畏又分人頭那痛个惡夢。就像人講个：看花人還知掃儕个艱苦咩！

冷天个九降風，颼颼滾吹等樹頂个葉仔搖啊搖仔，搖等搖等就叭叭跌，跌到歸籃球場淦淦个樹葉仔。負責掃籃球場个偈兜，日日斯掃到嘴嘟鼻翹，長下打早就掃到歸身汗流脈落，像做麼个大頭路樣。這兜樹葉仔盡搥耍人，仰般掃就掃毋俐，見擺正掃好，一陣風吹來，原旦掃好个地方又滿遍个樹葉仔。籃球場鋪一層个落葉，像係鋪地毯樣。

春天來咧，天時較燒暖兜，木棉花就開始大開，該像羽毛球火紅色个花蕊係另外一種風情，實在安腦得。地泥下不時就有一層貴貴个「花毯」，若係毋使掃，偈可能乜會欣賞佢兜个靚！這

一蕊一蕊跌下來个紅色羽毛球，帶來盡多麻煩，實在無結煞。

續下來，花謝咧。跔等春天腳步漸漸行遠，棉仔就開始跔風飄散到歸地泥。這兜白色个棉仔，又係一種新个挑戰，佢兜飛在空中，還會跔等風飛到滿哪仔，飛到哪黏在哪，逐隻角頭、背角就有佢个蹤跡。掃毋忒个棉仔，過敏个人，總係擋目珠；總係哈啾噴天，實在當得人惱！半點就感受毋著哪位浪漫？棉仔个季節過咧，又開始掃樹葉、掃落花、掃棉仔，年堵年恁樣過。偈投姐婆木棉樹恁得人惱，佢就講：「新娘靚係靚，拉屎得人驚。花仔跌下來，踩著狗食屎。」凡事有一好無兩好。

一年透天，木棉樹帶來無共樣个面貌：冷天个落葉；春天个落花；跔等來个棉仔。所以在這木棉花開个季節肚，毋單淨愛欣賞佢个靚，乜愛在這拚掃个過程裡肚，學會耐心膠堅持。逐擺个拚掃，都係膠自然共下生活个一種方式，雖然當恛，毋過分恁俚感受、欣賞著生活个好膠壞。

【擲大索个智慧】徐熏嫻原作

這係最尾一場个冠亞軍賽！

聽著「砰！」一聲，「沙！沙！1、2 沙！1、2 沙！」先生个聲哨跔等喊起來，逐儕雙手搭纏大絡索，身體向後背橫，腳躡穩向後箭，手腋下夾等个係力頭，心跳聲像在胸脯叮打鼓，順等額頭流下來个，係增志想愛贏个汗水。

無想著，對手一抹煞膠佢兜掙¹等過，第一場个比賽嘎輸忒。毋甘願个心情全寫在面町，想著斯伸一擺機會定，大家个心臟嘍嘍跳，脣頭加油个同學乜喊到嘶骸另命。先生愛佢兜心肝定貼、敌下大氣，聽節奏使力頭，雙腳愛像釘²在地泥下，每一步都穩穩箭等「贏」个影仔，總算掙轉拚第三場个機會。

第三場个銃聲「砰！」又響，大家尋轉同心協力个信心、共下喊出「沙！沙！1、2 沙！1、2 沙！」「一步一步退後，就係一步一步進前」，這句話乜在佢个耳空脣響起。掙過來又掙過去个大索，就像一尾趟過來又趟過去个蛇哥，看等這尾蛇哥強強就愛

溜過去咧！同學个加油聲緊來緊大，當像搵手拉樣。等該條紅索中心線，定定仔又佷過來，再過聽著「砰！」一聲，世界嘎恬忒一秒鐘，黏時歡喜靈天，大家暢到跳起來，鼓聲在四面八向響起來。無毋著！佢兜擲贏最尾个一場比賽！

想起這學期學校舉辦班際擲大索比賽，運動坪肚輒常看著當多班級在該練習。該駁仔先生在體育課教大家認識擲大索个基本規則摺技巧，當記得先生講：「擲大索，毋係比麼儕較大力，係比哪隻班級較團結！」這句話，聽起來當簡單，愛做斯無恁該，為著培養大家團結合作个精神，逐擺个練習，有同學个手巴掌起水膘、也有同學个膝頭措³到疤疤，無就跔到四腳惹天哇哇滾喊。毋過，無人講愛放棄。

這擺比賽个珍貴畫面，係佢兜向前進行个腳跡。拉起大索，佢兜學習愛仰般共下來敌氣；愛仰般來集中力頭；愛仰般堅持自家个定位，相信隊友。這毋係後退，係前進，用倒退來換轉成功，共心正做得改變局勢，欠一儕都做毋得。

逐場擲大索比賽，毋單淨係體能个輸贏，還較係志氣摺能力个考驗。佢兜用團結合作寫一場奮鬥个篇章，乜分佢學習著「向後退一步，就係向前進一大步！」个人生智慧。

¹ 掙：音 dui'；用力拉。

² 釘：音 dang'；深入。

³ 措：音 cu'；與外物磨擦。

【搖出味來】林芊慧原作

講著「涼水」，你會想著麼个？佢想大部分人定著黏時就想著手搖杯。對佢來講，涼水毋單淨止渴，還較像係一種分人寬心、歡喜个幸福。不管係放學後摻朋友買一杯緊行緊啲、緊打嘴鼓，抑係考試考忒摻自家鼓勵一下，一杯涼水，總做得帶分佢一隻好心情。

佢最中意个涼水係珍珠奶茶，奶茶該種醜醜个味緒，加上承牙个珍珠，見擺食了，歸日个煩惱就會毋見忒，嚟珍珠該種感覺，毋知仰般就係分人試著當滿足。

毋過，學校个健康教育課乜輒常提醒佢兜：這下盡多涼水糖分都當高，假使逐日都啲涼水，可能會變到肥卒卒仔，又還有蛀牙个問題。除忒對佢俚个身體毋好，學校先生還提醒佢兜有環保个問題。先生講：「你啲一杯涼水歡喜十分鐘，地球可能愛花幾下十年正做得分解該兜塑膠杯、封膜、啞管。尤其當多人都儘採掉，最尾可能會分海洋裡背个動物食著，係較嚴重兜，還會害佢兜死忒。」聽了佢正發現：原來佢俚逐日啲个一杯涼水，乜園等盡多問題。

所以，佢屋下開始做一兜仔改變。比論講，佢姆這下會自家泡茶、打果汁，還會做仙草加牛乳，新鮮又康健。這下佢乜會帶自家个環保杯去買涼水，還做得省五個銀呢！

涼水有無共樣个口味，就像人生共樣。有人中意甜个；有人中意酸个；有人中意醜醜个奶茶；有人中意清香个冷泡茶。就像佢俚个人生，乜無可能單淨一種味緒。有時節係甜个——像考試打頭名、朋友送你生日禮物；有時節係酸个——像摻朋友冤家；有時節係苦个——像考試壓力大。

因為有這兜無共樣个味緒，人生正有變化、有故事，就像啲一口有滴仔苦苦醜醜个奶茶以後，顛倒會較珍惜下一口甜甜个奶波。生活肚無可能逐日都恁順序，乜無可能日日都恁快樂，假使佢俚願意體會這兜酸甜苦辣，乜係佢俚成長个一部分。

涼水做得帶分人快樂，毋過佢俚絕對愛學會選擇對身體好个；對地球友善个；還較愛知準則。人生乜共樣，毋係追求「越多越好」，係「堵堵好最好」。

編號 6 號

【 佢係細市長 】周昱原作

還細个佢，最熟事个，毋係哪間補習班抑係才藝班，係鬧熱煎煎有滄滄人情味个夜市。

為著分佢有較好个生活，阿姆日時頭在田町做事，臨暗仔又愛煞煞去夜市排攤仔賣耳環、皮包仔、夾仔這兜。美濃夜市、高樹夜市、六龜夜市……，哪片有人，哪片就有阿姆个身影。阿姆雖然逐日春上春下，毋過佢毋識聽佢喊苦過。佢「齧等牙根擔得硬，擲等草根上得崁」个精神，係佢一生人个榜樣。

該下佢正讀國小，阿姆總係駛等佢該輛廂型車來接佢下課。該輛車就像一隻細型个倉庫，裡背堆到滄滄个貨摺鐵架仔，毋過，阿姆就像變奇術樣，用佢个巧手「變」出一隻細縫仔分佢坐。雖然當尖、當毋好坐，毋過佢還係會恹到緊啄咕，係講佢無睡忒，佢就會摺阿姆搵下貨、排攤仔。當然，有時節佢會詐意睡忒，享受一下「分阿姆惜」个特權。

攤仔排好勢，佢會拜託阿姆分佢八十個銀，去買佢最好食个雞排。行等去雞排攤个時節，會順續「巡邏」歸隻夜市、「監督」大家有認真做生理無，所以大家喊佢「夜市个細市長」。

涼水攤个阿姨會搵手喊佢過去：「市長，這杯珍珠奶茶請你啉！」賣 QQ 卵个頭家乜會熱情講：「阿弟牯，這包拿去摺若姆共下食！」該時節个佢，手町拿等食个東西，心肝肚張滄快樂摺沙鼻。

夜市乜係佢第一擺「賺所費」个地方。逐擺隔壁賣香酥雞个頭家人手毋罅，就會喊佢去搵手落袋仔、秤斤兩，做兜簡單个事頭，三點鐘就賺著三百個銀。對當時還細个佢來講，就像係著頭獎三百萬樣，暢到耐毋得。係講頭家無尋佢，佢就留在阿姆个攤仔町搵手招人客、收錢、找錢，順續當沙鼻个等人客安腦佢。佢兜總係笑等講：「你除忒毋曉駛車仔，還有麼个毋會个？」該時節个佢，鼻空早斯翹到嫦娥該片去咧。

夜市，毋單淨係佢食夜、賺所費个地方，還較重要个係，該位有佢摺阿姆兩子哀快樂个回憶。這下大咧了後，逐擺行落夜市，看著一盞一盞个電火、一隻一隻無閒直掣个身影，總會想起頭擺該段日仔、該兩子哀个身影——在夜市巡來巡去个細市長、用雙手撐起歸隻屋下个阿姆。

【西瓜錫烏蠅】李怡蘋原作

佢讀小學個時節，逐年避暑爺哀都會載佢去姐公屋下寮一、兩隻月。記得有一擺，阿爸駛車仔經過西瓜田，佢看著該西瓜一隻一隻在路脣疊到高高，脣頭一埗牌仔寫等「一隻 100 箍」，阿媽黏時講：「啊哦，仰恁便宜，摘個工錢都毋罅哦！」就喊阿爸膠車仔停下來，擇一隻大西瓜帶去姐公屋下。

到臨暗仔咧，天時還係當翕熱，食飽夜過後，大家將就兜幾張凳仔在大樹下寮涼、打嘴鼓。佢在灶下膠姐婆搵手，拿出該隻大西瓜切到一嫌一嫌。姐婆最惜佢，看佢口水強強會跌下來咧，就先切一埗分佢食。哇！沙沙、甜甜又透心涼，還好食哪！佢遽遽兜去大樹下，大家一嫌食忒又一嫌，食到舐嘴躡鼻。這時，在佢耳空頭聽著「噏——噏——」個聲，原來係一隻烏蠅，怕係分西瓜個甜味錫著，就在佢脣頭飛上飛下。佢顧食西瓜哪有時間插佢，就儘採用手拂兩下想愛膠佢撒走，無想著過無一下，這毋知死個烏蠅又飛過來噏噏噏噏，實在還得人惱。

人講媼馬乜有一步踢，天生萬物都有佢個優點膠用處，像勤勞個糖蜂仔會採蜜，靚靚個蝶仔做得分人欣賞，做麼個這烏蠅就

無半點好呢！生到賊仔樣，兩隻目珠仁大嫲粒，歸身又烏疏疏仔，斯會滿哪仔柑滿哪仔啄，害人屙痢肚。佢長下聽著大人講：「有人放符就有人收。」斡頭就問姐公：「姐公，頭擺人都會在屋下畜一條貓仔來捉老鼠，你講這烏蠅最驚麼个呢？佢俚來畜一隻，恁樣就毋驚烏蠅來作怪咧！」阿爸在脣頭聽著詐意撩佢講：「該佢俚……畜一隻蜷崎好無？」阿媽哀哦！莫講笑哪，一隻得人惱、一隻又得人驚，半斤八兩無較贏！

佢話斯言講煞，該隻烏蠅又飛轉來咧，還柑在西瓜町。佢目町町仔看等佢飛啊飛仔，最尾停在凳頭頂。欸，機會來咧，佢煞煞抄起報紙對準準就愛打過去……。啊！分佢飛走咧。佢喊阿爸遽遽來搵手，老弟乜興蹠蹠仔來鬥鬧熱。大家七手八腳，姐婆看著笑等講：「毋使恁無閒，遽遽膠西瓜皮收收起來，莫放在該錫烏蠅正有影哪。」

係哦，臭肉錫烏蠅！佢煞煞膠西瓜皮放落垃圾袋，又緝到纏纏，恁樣這得人惱个烏蠅就無戲好唱咧。

【雞卵花】鍾孝昇原作

這駁仔行過社區个公園，看著雞卵花又開咧。香味跔等風吹過來，白花黃心，跌到石頭路町，就像一隻一隻切開來个燂卵，分人停下腳步，定定仔欣賞。

佢跔下來，拈起一蕊正跌啊下來个雞卵花。佢雖然離開樹極咧，毋過無綿忒，還係白雪雪仔，有滴仔香味。這蕊花，黏時就分佢想起，前幾日學校舉辦个「動福卵」活動。

該日，佢兜邀請著對龍潭「北一農場」來个劉大姊，分享「友善飼養」个觀念。佢表示：雞仔若係畜在籠肚，無法度自由行動抑係晒日頭，就會變到當緊張、三不二時就著病，生出來个卵，自然毋會健康。

佢還講：「臺灣現下正式友善畜个雞卵，大體正兩成定定。大部分个雞卵，還係來自格籠个。『友善飼養』，係一種尊重生命个畜動物方式。」

這場活動，毋單淨分學生仔了解動物个福利，也感動著家長。有一個阿姆講：「原來逐隻雞卵背後，就有一隻雞嫲快樂抑

係悲傷个故事。」下二擺去市場買雞卵，會還較支持「動福卵」。

活動當中，細人仔還用「動福卵」做卵捲。有一個學生仔講：「係講雞仔會笑，佢生出來个卵，一定會還較康健。」聽著這句話，佢試著當感心。家庭教育日，佢兜教細人仔安心食東西个方式，也教佢兜關心生命个方式。

佢又想起舊年，學校摺舊个雞埕改做「生命教育園區」个時節，也試辦過一隻祈福卡个活動。有一個學生仔寫：「希望雞嫲做得過等幸福个生活。」短短一句話，就表現出細人仔對生命个尊重摺祝福。這正經就係佢兜做生命教育个目標——教細人仔對尊重一隻卵開始，了解生命个價值，學會溫柔對待世界萬物。

就像雞卵花个一生，花開代表出生，花謝就係離別，雖然花落到地泥，毋過香氣還在。人乜共樣，總愛一生對人有愛、做有意義个事，雖然有一日定著會離開，也會留下分人記得个身影。

看等公園滿地泥个雞卵花，想著佢這幾年為著細人仔設計生命教育課程，雖然在過程當中，可能會堵著打擊，毋過，還較多个係感謝。因為佢知：有兜香氣，毋單淨係為著自家留存，還有分人記得「送花分人手留香」个用途。